

Illulioriternernut aningaasalersuineq pillugu Inatsisartut peqqussutaat

Inissaqartitsineq, inissaqarnermut ikiorsiissuteqartarnek, inigisanik attartortitsisarnek il. il. pillugit Kalaallit Nunaannut inatsimmi nr. 944-mi decembarip 23-anni 1986-imeersumi § 1 malillugu makku aalajangersarneqarput:

Kapitali 1

Atuuffissat

§ 1. Peqqussut manna makkununga atorineqassaaq:

- 1) Inissianut nutaanut aningaasalersuinissanut taarsigassarsititsineritut, tak. kapitali 2.
- 2) Inunnut, inissiamik pioreersunik pigisaqartunut najugaqartunullu, inissiap iluarsaanneqarnissaanut, pitsanngorsarneqarnissaanut allilerneqarnissaanullu aningaasalersuinissamut taarsigassarsititsineritut, tak. kapitali 3.

Imm. 2. Inissianut inuussutissarsiutinik ingerlataqarfigineqartussanut imaluunniit ingerlataqarfiusunut kapitali 2 aamma 3 naapertorlugit taarsigassarsititsisoqarsinnaangilaq. Taamaattorli inuussutissarsiutit annikinnerusut namminersorfusut tassani pineqanngillat.

§ 2. Sanaartornernut taamaallaat taarsigassarsititsisoqarsinnaavoq, inissiap sananeqarnerata, iluarsaanneqarnerata, pitsanngorsarneqarnerata imaluunniit allilerneqarnerata nalaani sanaartornerni pilersaarusiornernilu inatsisit atuuttut eqqortinneqarpata.

§ 3. Sanaartornernut taamaallaat taarsigassarsititsisoqarsinnaavoq, neriorsuummik tunniussisoqannginnerani sanaartugassanut isumaqatigiissummik atuuttussamik isumaqatigiissusiortoqarsimanngippat imaluunniit sanaartugassanik aallartitsisoqarsimanngippat.

Kapitali 2

Nutaanik illulioriternernut aningaasalersuinerit

§ 4. Inissianik nutaanik aningaasalersuineritut sanaartukkanut ataasiakkaanut aningaasartuutit tamarmiusut 20 %-iilik Naalakkersuisut kommunalbestyrelsillu taarsigassarsititsisinnaapput.

Imm. 2. Naalakkersuisut kommunalbestyrelsillu *imm.* 1 naapertorlugu taarsigassarsiarititaat inissiamut annerpaamik 110 kvadratmeterimut annertussusilerneqassapput, tamatumani inissiaq annertunerugaluarpalluunniit.

Imm. 3. *Imm.* 1 naapertorlugu Naalakkersuisut kommunalbestyrelsillu taarsigassarsiarititaat imatut ilusilerneqassapput:

- 1) 65 kvadratmeterinut siullernut sanaartornernut aningaasartuutinit tamakkiisunit annerpaamik kvadratmeterimut 15.500 koruunit taarsigassarsiaritinneqassapput, tamatumani kvadratmeterimut

akiusoq annertunerugaluarpalluunniit.

2) 66 kvadratmeterimiit 110 kvadratmeterimut sanaartornermut aningaasartuutinit tamakkiisunit annerpaamik kvadratmeterimut 10.250 koruunit taarsigassarsiaritinneqassapput, tamatumani kvadratmeterimut akiusoq annertunerugaluarpalluunniit.

Imm. 4. Imm. 1 naapertorlugu aatsaat taarsigassarsititsisoqarsinnaavoq, taarsigassarsisup sanaartornermut aningaasartuutinit tamakkiisunit sinneruttut nammineerluni aningaasalersussappagit.

§ 5. Inissiap annertussusaa inissiami init tamarmik annertussusaattut naatsorsorneqassaaq, tak. imm. 2. Pequusiviit, quit, biilnut oqquisitsiviit, aneerasaartarfiit biilluunniit unittarfii qulisat, illup silammut iigaasa avataanniittut imaluunniit inissiamit immikkoortillugit inissitat naatsorsuinermit ilanngunneqassanngillat, taakku oqorsarlugit inigisassatut atorineqassanngippata.

Imm. 2. Inissiap annertussusaa imatut naatsorsorneqassaaq:

1) Naqqup ataani inissiap annertussusaa naqqup ataata silammut iigaaniit illup takissusaanut silissusaanullu amerlisitsilluni naatsorsuinikkut uuttorneqassaaq. Naqqup ataa tamakkerluni atorineqanngippat, inissiap annertussusaa illup iluani iikkat ininik immikkoortitsissutaasut qeqqanniit uuttisoqassaaq. Init naqqi tamakkerlutik cementimik betonimilluunniit qallerneqanngippata, taakku uuttortaanermit ilanngunneqassanngillat.

2) Inissiap quleriinnerani init quleriinni nalinginnaasumiittut inissiami ataatsimi silami iikkamiit imaluunniit qaliata silataani iikkamiit, tak. nr. 3, aamma inissiap avinnerata qeqqaniit annertussuseq uuttortarneqassaaq. Ilaqutariinnut arlalinnut inissiaarsuarni uuttortaanermit illup isua iikkatut inissianut immikkoortitsissutaasutut affartut nalilerneqartarpoq. Qisuit qalliutaasut marluuppata, ataatsip uuttornerani qisuup alliup silataaniit uuttisoqassaaq.

3) Qaliani inissiap annertussusaata naatsorsornerani, illup takissusaanut silissusaanullu amerlisitsilluni naatsorsuinikkut uuttisoqassaaq. Takissuseq inissiap quleriivini nalinginnaasuni uuttuisarnertut uuttorneqassaaq, silissuserlu silami qaliat qalliutaasa qaliap naqqaniit 1,5 meterinik portussuseqartut akornanni uuttorneqassalluni. Ilassutit, soorlu aniingarnit iikkat inimut killiliissutaasut silataanniit uuttorneqassapput.

Imm. 3. Naqqup ataani qalianilu init imm. 2, nr. 1-imi aamma 3-mi taaneqartut aatsaat najugassatut ilusilersorneqarsimappata, init annertussusaat uuttortaanermit ilanngunneqassapput.

Imm. 4. Init aalaakkaasunik nateqanngitsut uuttortaanermit ilanngunneqassanngillat, taamaattorli tak. imm. 5.

Imm. 5. Inissiami majuartarfiit annertussutsimik uuttortaanermit inini quleriinni atorineqarfigisaminni ilanngunneqassapput. Iserterfiit, majuartarfiit majuartarfiillu sangoriaat ataatsimut atorineqartut, illup silammut iigaasa iluini inini kiassakkani inissisimasut angissusaannut naapertuuttumik uuttortaanermit ilanngunneqassapput, taamaattorli annerpaamik 11 kvadratmeterinik annertussusilerneqassallutik.

§ 6. Inissiap kvadratmeterimut akia agguaqatigiisitseriaaseq tunngavigalugu naatsorsorneqassaaq, tassani inissiap sananeqarneranut aningaasartuutissat tamakkiisut inissiat annertussusaannut tamakkiisumut agguarneqassalluni, tak. § 5.

Imm. 2. Taarsigassarsinissamik qinnuteqartup sanaartornermut aningaasartuutissat tamakkerlugit naatsorsussavai, taakkulu ilaatigut tassaapput pilersaarusiornermut aningaasartuutit, sanasunut aningaasartuutit, sanaartornissamut taarsigassarsinermit ernialiussat, sanaartorfissami sanaartorfissagissaaneq, sanaartornermik aqutsineq, qularnaveeqqusiussaqluni taarsigassarsinermit allagartap suliarineqarnera nalunaarsorneqarneralu kiisalu naqissusiinermit akitsuutit.

Imm. 3. Taarsigassarsinissamik qinnuteqartup sulinerata nalinga sanaartornermut aningaasartuutit tamakkiisut naatsorsornerinut ilanngunneqassanngilaq.

§ 7. § 4, imm. 1 naapertorlugu taarsigassarsiat inissiat naammassinerini akilerneqassapput, tamannalu taamaallaat atuilernissamut akuersisummik, sanaartornermi naatsorsuutininik inaarutaasunik, qularnaveeqqusiussaqaarluni taarsigassarsinermi allagartap uparuagassartaqanngitsup naqeqqaarneranik nalunaarsorsimasumik naqissusersimasumillu, kiisalu qularveeqqusiiffigisap nalunaarutaata naqeqqaarneranik takutitsinikkut pissaaq. Taamaattorli Naalakkersuisut taarsigassarsiarititassaat siusinnerpaamik ukiumi, taarsigassarsinissamut aningaasaliissutit Inatsisartut aningaasaqarnermut inatsisaannut ilanngunneqarfiini tunniunneqarsinnaapput, kiisalu kommunalbestyrelsip taarsigassarsiarititassaat siusinnerpaamik ukiumi, aningaasaliissutit missingersuutitut kommunalbestyrelsip akuerisaannut ilanngunneqarfiini tunniunneqarsinnaallutik.

Imm. 2. Taarsigassarsianut inissiaq qularnaveeqqusiunneqassaaq. Taarsigassarsiani taarsigassarsiat inissiaq qularnaveeqqusiullugu taarsigassarsiaritinneqartut tullerriaarinermi ataqqineqassapput, tak. § 4, imm. 4.

Imm. 3. § 4, imm. 1 naapertorlugu taarsigassarsiat ulloq atuilernissamut akuersisummik tunniussivik aallarnerfigalugu ukiuni 20-ni erniaqaratillu taarsersugassaassanngillat, tamatumalu kingorna Nationalbankip erniaritittagai procentinik pingasunik ilallugit erniaqartinneqarlutik amerlaqatigiinnik annertussusilerlugit ukiuni 15-ini akilersugassanngussallutik.

Imm. 4. § 4, imm. 1 naapertorlugu taarsigassarsiat akilersornissaannut akiligassallu akilerneqartarnissaannut maleruagassanik aalajangersaasinnaapput.

§ 8. § 4, imm. 1 naapertorlugu taarsigassarsiarititat piginnittut nikinneranni akiligassanngortinneqassanngillat. Piginnittunik nikittoqarneri tamaasa Naalakkersuisut kommunalbestyrelsilu ilisimatinneqartassapput.

Imm. 2. Piginnittut nikinneranni § 4, imm. 1 naapertorlugu Naalakkersuisunit kommunalbestyrelsimillu taarsigassarsiarititat, annerpaamik pisinermi akiusup 90 procentianik annertussuseqartut, aammalu taarsigassarsiat § 4, imm. 1 naapertorlugu taarsigassarsiarititaasut aningaasartaannik ilanngaaserneqarsimasut salliutinneqassapput.

§ 9. Naalakkersuisut kommunalbestyrelsillu taarsigassarsiarititaat akiligassanngortinneqassapput:

1) Taarsigassarsianut ernialiussat akilersuutillu akilerneqanngippata, aammalu taarsigassarsisimasooq illuummik aalaakkaasumik qularnaveeqqusiussaqaarluni taarsigassarsinermut allagartami ernianik akilersuutinillu akilersuisarnermut maleruagassat naapertorlugit piffissap akiliiffissap qaangiunnerani akiliisimangippat, tak. Kalaallit Nunaanni qularnaveeqqusiussaqaarluni taarsigassarsisarneq pillugu Inatsisartut peqqussutaat.

2) Taarsigassarsisimasup inissiaq illersorsinnaasumik aserfallatsaalisimangippagu, taamaalillunilu Naalakkersuisut kommunalbestyrelsilu qularnaveeqqusiissutikkut qulakkeeriffigineqarnerat nalikinnerulersooq paasineqarpat, tak. § 16, imm. 1.

3) Taarsigassarsisimasup inissiaq ikuallattoornissamut anorersuarneranilu ajoqusernissamut sillimmasersimangippagu, tak. § 17.

4) Taarsigassarsisimasup inissiaq inissianik attartortitsisarneq pillugu Inatsisartut peqqussutaanni attartortitsinermut aalajangersakkani aalajangersarneqartut uniorlugit attartortippagu.

5) Inissiami ininik inuussutissarsiorfusunik pilersitsisoqarsimappat imaluunniit inissiamiit

inuussutissarsiornermik ingerlatsisoqarpat. Taamaattorli tassani inuussutissarsiornerit annikinnerusut namminersorfiusut pineqanngillat.

Kapitali 3

Inissianik pioreersunik iluarsaassineq, pitsanngorsaaneq alliliinerlu

§ 10. Naalakkersuisut inissianik pioreersunik iluarsaassinermut, pitsanngorsaaneq alliliinermullu tamatumunnga aningaasartuutit tamakkiisut 40%-iinik taarsigassarsititsisinnaapput.

Imm. 2. Taarsigassarsinissamik qinnuteqartup iluarsaassinissamut, pitsanngorsaaneq alliliinissamullu aningaasartuutissat tamakkiisut naatsorsussavai, taakkununga ilaatigut pilersarusiornermut aningaasartuutit, sanasunut aningaasartuutit, sanaartornermut taarsigassarsianut erniarititat, sanaartornermik aqutsineq, qularnaveeqqusiussaqluni taarsigassarsinermut allagartap suliarineqarnera nalunaarsorneqarneralu, kiisalu naqissusiinermut akitsuutit ilaatinneqassapput.

Imm. 3. Taarsigassarsinissamik qinnuteqartup sulinerata nalinga sanaartornermut aningaasartuutit tamakkiisut naatsorsornerinut ilanngunneqassanngilaq, tak. imm. 2.

§ 11. Iluarsaassinissamut pitsanngorsaaneq alliliinermullu taarsigassarsititsinermi taamaallaat inissianik, piffissami qinnuteqarfiusumi ukiut 20-t sinnerlugit pisoqaassuseqartunik, aammalu 95 kvadratmeterit sinnernagit angissuseqartunik piginnittunut taarsigassarsititsisoqarsinnaavoq.

Imm. 2. Iluarsaassinermi pitsanngorsaaneq alliliinermullu pineqartut tassaasinnaapput illup qallersuutai, igalaat matullu silarliit, qaliat, innaallagissamik pilersuinermit atortut, kuuffit, isaarissat, naqitsineq iluaqutigalugu imermut kuuffit assigisaallu. Iluarsaassinernut pitsanngorsaaneq alliliinermullu inuulluataarniutitut taaneqarsinnaasunut taarsigassarsititsisoqarsinnaanngilaq.

§ 12. Alliliinissanut taarsigassarsititsinermi taamaallaat inissianik, piffissami qinnuteqarfiusumi ukiut 20-t sinnerlugit pisoqaassuseqartunik, allilerneqannginnerminnilu 95 kvadratmeterit sinnernagit angissuseqartunik piginnittunut taarsigassarsititsisoqarsinnaavoq. Inissianut allilerneqarnermik kingorna 110 kvadratmeterit sinnerlugit angissuseqalersussanut alliliinissamut taarsigassarsititsisoqarsinnaanngilaq.

§ 13. § 10, imm. 1 naapertorlugu taarsigassarsiaritinneqartut annerpaamik 283.500 koruuninik annertussuseqarsinnaapput.

Imm. 2. § 10, imm. 1 naapertorlugu taamaallaat taarsigassarsititsisoqarsinnaavoq, taarsigassarsiallip nammineerluni iluarsaassinermut, pitsanngorsaaneq alliliinermullu aningaasartuutinit tamakkiisunit sinneruttut aningaasalersinnaappagit.

Imm. 3. § 10, imm. 1 naapertorlugu taarsigassarsiarititat inissiaq qularnaveeqqusiullugu taarsigassarsiatut erniaqanngitsutut akilersugassaanngitsutullu tunniunneqassapput.

Imm. 4. Naalakkersuisut taarsigassarsiarititaat piginnittut nikinneranni akiligassanngortinneqassapput, tamatumani taarsigassarsisimasup aamma taarsigassarsisimasup aappaata akornanni piginnittut nikinnerat pineqanngippat, imaluunniit taarsigassarsisimasooq allamik aalajangigaqanngippat.

Imm. 5. Inissiamut ataatsimut taarsigassarsiarititat ataasiinnaat tunniunneqarsinnaapput, tak. § 10, imm. 1.

§ 14. § 10, imm. 1 naapertorlugu taarsigassarsiarititat iluarsaassineq, pitsanngorsaaneq alliliinerluunniit naammassippat tunniunneqassapput, tamannalu taamaallaat sanaartornermi naatsorsuutinit uppernarsagaasunik, qularnaveeqqusiussaqluni taarsigassarsinermi allagartap uparuagassartaqanngitsup naqeqqaarneranik nalunaarsorsimasumik naqissusersimasumillu, kiisalu qularveeqqusiiffigisap nalunaarutaata naqeqqaarneranik takutitsinikkut pissaaq. Taamaattorli

taarsigassarsiarititassat siusinnerpaamik ukiumi, taarsigassarsinissamut aningaasaliissutit Inatsisartut aningaasaqarnermut inatsisaannut ilanngunneqarfiini tunniunneqarsinnaapput.

Imm. 2. Alliliinerni taarsigassarsiarititassat akilerneqarnissaannut aamma atuilernissamut akuersissutip takutinneqarnissaa piumasarineqarpoq.

§ 15. Naalakkersuisut taarsigassarsiarititaat akiligassanngortinneqassapput:

1) Taarsigassarsisimasup inissiaq illersorsinnaasumik aserfallatsaalisimanngippagu, taamaallunilu Naalakkersuisut qularnaveeqqusiissutikkut qulakkeeriffigineqarnerat nalikinnerulersoq paasineqarpat, tak. § 16, imm. 1.

2) Taarsigassarsisimasup inissiaq ikuallattoornissamut anorersuarneranilu ajoqusernissamut sillimmasersimanngippagu, tak. § 17.

3) Taarsigassarsisimasup inissiaq inissianik attartortitsisarneq pillugu Inatsisartut peqqussutaanni aningasartuutit tunngavigalugit attartortitsinermut aalajangersakkani aalajangersarneqartut uniorlugit attartortippagu.

4) Inissiami ininik inuussutissarsiorfusunik pilersitsisoqarsimappat imaluunniit inissiamiit inuussutissarsiornermik ingerlatsisoqarpat. Taamaattorli tassani inuussutissarsiornerit annikinnerusut namminersorfiusut pineqanngillat.

5) Taarsigassarsisimasup inissiaq qimappagu.

Kapitali 4

Aserfallatsaaliuineq, allanngortiterinerit sillimmasiisarnerlu

§ 16. Inissiaq § 4, imm. 1 aamma § 10, imm. 1 naapertorlugu taarsigassarsititsiviusoq illersorsinnaasumik aserfallatsaaliineqassaaq. Aserfallatsaaliuinnermut aningaasartuutit piginnittup akiligassarai.

Imm. 2. Piginnittoq illumi silataani iluanilu allanngortiterisinnaatitaavoq. Allanngortiterinerit assessorluni suliaasanut illersorneqarsinnaasumik paasisimasalinnit aammalu sanaartornermut inatsimmi il. il. piumasarineqartut naapertorlugit taamalu Naalakkersuisut kommunalbestyrelsillu qularnaveeqqusiissutaanik nalikinnerulersitsiviunngitsumik suliarineqassapput.

§ 17. Inissiat taarsigassarsititsiviusut minnerpaamik ikuallattoornissamut anorersuarneranilu ajoqusernissamut sillimmaserneqarsimassapput.

Kapitali 5

Taarsigassarsinissamik qinnuteqaatinik il.il. aqutsineq

§ 18. Inatsisartut peqqussutaat manna naapertorlugu suliarinninnermut aningaasartuutitut matusissutissatut akitsuummik, § 4, imm. 1, § 10, imm. 1 aamma § 22. imm. 2 naapertorlugit pisortanit taarsigassarsiarititanut tamakkiisunut inaarutaasumik inerniliussat 0,5 procentiinik annertussuseqartumik akiligassanngortitsisoqassaaq.

Imm. 2. Piffissami taarsigassarsisup taarsigassarsiat akileqqullugit taarsigassarsititsisumut qinnuteqarfigisaata nalaani taarsigassarsisup akitsuut taarsigassarsititsisumut akilissavaa.

§ 19. Naalakkersuisut kommunalbestyrelsilu tamarmik immikkut qularnaveeqqusiussaarluni taarsigassarsinermut allagartap atsiorderanut, tassunga ilanngullugu § 8, imm. 1 naapertorlugu piginnittut nikinnerannut, taarsigassarsisup taarsigassarsiaminik allanngortitsineranut, kingornussassat suliarineqarnerinut aamma akiliinissamik nukingisaarinermut atsiuinnermut atatillugu suliarinninnermut 1.250 koruuninik akileeqqusiinnaapput.

Imm. 2. Naalakkersuisut kommunalbestyrelsillu aningaaserivik ataaseq amerlanerusulluunniit qularnaveeqqusiussaqluni taarsigassarsinermut allagartat atsiornissaannut, kiisalu akitsuummik akiliisitsinissamut piginnaatitsissuummik tunisinnaavaat.

§ 20. Inissianik nutaanik aningaasalersuutissanik taarsigassarsinissamik allakkatigut qinnuteqaatit Naalakkersuisunut kommunalbestyrelsimullu nassiunneqassapput.

Imm. 2. Qinnuteqaammut ilanngunneqassapput:

- 1) Pilersaarummut nassuiaat, inissiat amerlassusaannut inissiamullu ataatsimut annertussusissamut paasissutissanik imaqartinneqartoq.
- 2) Sananermi sanaartornermut aningaasartuutitut tamakkiisunut missingersuutit.
- 3) Kommunalbestyrelsimiit nunaminertamik immikkoortitsinermut imaluunniit nunaminertamut tunniunneqartumut uppersaata.
- 4) Nammineerluni aningaasalersuutissat pissarsiarineqarsinnaaneritut uppersaatait, tak. § 4, imm. 4.
- 5) Qinnuteqartup kinaassutsiminut uppersaataa ersarisoq.

Imm. 3. Qinnuteqaatit nassiunneqartut tunngavigalugit Naalakkersuisut kommunalbestyrelsilu tamarmik immikkut qinnuteqaatigineqartut aningaasalersorneqarsinnaanersut isummissapput.

§ 21. Inissiani pioreersuni iluarsaassinissamut, pitsanngorsaanissamut alliliinissamullu allakkatigut qinnuteqaatit Naalakkersuisunut nassiunneqassapput.

Imm. 2. Qinnuteqaammut ilanngunneqassapput:

- 1) Iluarsaassinissamut, pitsanngorsaanissamut alliliinissamullu kissaatigineqartumut nassuiaat.
- 2) Inissiaq pillugu nassuiaat, tassunga ilanngullugu pisoqaassusaa, angissusaa pitsaassusaa.
- 3) Suliassamut aningaasartuutissanut tamakkiisunut missingersuusi.
- 4) Suliassami pineqartumi nunaminertamik pisariaqartitsisoqassappat, kommunalbestyrelsimiit nunaminertamik immikkoortitsinermut imaluunniit nunaminertamut tunniunneqartumut uppersaammik pissarsisoqassaaq.
- 5) Nammineerluni aningaasalersuutissat pissarsiarineqarsinnaaneritut uppersaatait, tak. § 13, imm. 2.
- 6) Qinnuteqartup inuttut normua najugaqarnerminullu uppersaataa.

Imm. 3. Qinnuteqaatit nassiunneqartut tunngavigalugit Naalakkersuisut qinnuteqaatigineqartut aningaasalersorneqarsinnaanersut isummissapput.

§ 22. Taarsigassarsinissamik qinnuteqaat Naalakkersuisunit imaluunniit kommunalbestyrelsimiit akuerineqarpat, taarsigassarsinissamut neriorsuut suliarineqassaaq, tassanilu taarsigassarsiat annertussuserigallagassaata aammalu taarsigassarsinermut atugassarititaasut allassimassapput.

Imm. 2. Taarsigassarsiat inaarutaasumik annertussusissaat sanaartornermut naatsorsuutit inaarutaasumik akuerisat tunngavigalugit naatsorsorneqassapput.

Imm. 3. Aningaasartuutitut missingersuutit tunngavigalugit pisortat taarsigassarsiarititaannut aningaasaliissutissat allannguuteqarpata, aammalu allannguutit taarsigassarsiat inaarutaasumik annertussusissaannut sunniuteqarpata, taarsigassarsiniarluni qinnuteqartup pisariaqanngitsumik kinguarsaanertaqanngitsumik tamanna Naalakkersuisunut kommunalbestyrelsimullu nalunaarutigissavaa. Tamanna pinngippat taarsigassarsiat inaarutaasumik annertussusissaat neriorsuutigineqartunit annertunerulersinneqarsinnaanngillat.

§ 23. Inissiap sananeqarnera, iluarsaanneqarnera, pitsanngorsarneqarnera allilerneqarneralu taarsigassarsinissamut neriorsuutitut allakkiap suliarineqarneraniit ukiut marluk qaangiutinnginnerini aallartinneqareersimassaaq, kiisalu ukiut pingasut qaangiutinnginnerini naammassineqareersimassalluni

atorneqalereersimassallunilu. Tamanna pinngippat neriorsuut siumoortumik nalunaarutigineqarani atorunnaarsinneqassaaq.

Imm. 2. Taarsigassarsisoq taarsigassarsinissamut neriorsuutitut allakkiap ullormi suliarineqarfianiit ukiut marluk qaangiutinnginnerini suliaq aallartinneqareersimanersoq aallartinneqareersimannginnorsorluunniit pillugu paasissutissanik Naalakkersuisunut nassiussissaaq. Suliaq aallartinneqareersimappat, tamanna pillugu uppersarsaat, taarsigassarsisumit suliarineqartoq, aammalu nutaamik sananermi kommunimit uppersarsarneqartoq ilanngunneqassaaq.

Imm. 3. Taarsigassarsisup taarsigassarsinissamut neriorsuutitut allakkiap ullormi suliarineqarfianiit ukiut pingasut qaangiutinnginnerini atuilernermut uppersarsaatip assilinera Naalakkersuisunut nassiutissavaa.

Imm. 4. Naalakkersuisut pisuni immikkut ittuni piffissamut killissarititaasut imm. 1-imi allassimasut uniorneqarnissaannut immikkut ittumik akuersissuteqarsinnaapput.

Kapitali 6

Atulernissaanut, atorunnaarnissaanut ikaarsaarnermullu aalajangersakkat

§ 24. Peqqussut 1. juli 2007 aallarnerfigalugu atuutilerpoq.

Imm. 2. Tamatumunnga peqatigitillugu illuliortiternernut aningaasalersuineq pillugu Inatsisartut peqqussutaat nr. 4, 30. oktober 1998-imeersoq atorunnaarsinneqarpoq.

§ 25. §§ 4-mi aamma 10-mi aalajangersakkat taarsigassarsinissamik neriorsuutitut, peqqussutip atuutilinnginnerani tunniunneqarsimasunut atuutissanngilaq.

Namminersornerullutik Oqartussat, ulloq 7. maj 2007

Hans Enoksen

/

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat
Naalakkersuisut